

共同經課 - 1 使徒行傳二章一節~二十一節

1 五旬節 ê 期已經到, in lóng 聚集 tī 一所在。2 忽然 tùi 天有聲, 親像大風 teh 吹, 充滿 in 所坐 kui 間 ê 厝。3 就有 teh 分開 ê 舌, 出現 hō in 看見, 親像火 ê 舌, 歇 tī tak 人 ê 頂面。4 In lóng 受聖神充滿, chiah 開嘴講別樣 ê 腔口, 是照聖神所賞賜 in 講 ê。5 Hit 時有虔誠 ê 猶太人, tùi 天下 tak 國來 ê, toà tī 耶路撒冷。6 Chit-ê 聲一下起, 眾人聚集紛紛亂亂, 因為 tak 人聽見 in 照伊家己 ê 土腔來講。7 就 lóng gông-ngiáh 奇怪, 講, 你看, chiah-ê teh 講 ê kiám 無一概是加利利人 mah? 8 怎樣咱聽 in 講照咱 tak 人所出世 ê 土腔 ah? 9 咱 chiah-ê Phàⁿ-th ê-a 人、Bí-thài 人、Í-lân 人, kap tiàm-tī Bí-só-pho-tāi-bí, 猶太 kap Ka-phàⁿ-to-ka, Pún-to kap 亞西亞, 10 Hut-lū-ka kap Pông-hui-lī-a, 埃及近 oá 古利奈 ê Lū-pí-a, chiah-ê 地方 ê 人, 以及 tùi 羅馬來 ê 出外人, 有 ê 是猶太人, 有 ê 是入猶太教 ê 人, 11 Kek-lí-tí 人、A-lat-pek 人, lóng 聽 in 用咱 ê 腔口來講上帝 ê 大事。12 就 lóng gông-ngiáh 躊躇, saⁿ-kap 講, 這甚麼意思? 13 亦有別人恥笑 in 講, in 是 lim 新酒 teh 醉。14 總是彼得 kap 十一個使徒 khiā-teh, 大聲 kā in 講, 猶太人, kap lóng 總 khiā 起 tī 耶路撒冷 ê 百姓 ah, lín tiòh 知 chit-ê, 亦 tiòh 致意聽我 ê 話。15 Chiah-ê 人 m̄ 是酒醉, 親像 lín 所 phah 算; 因為 chit-tiáp tú-chiah 頂晡九點鐘: 16 這就是託先知約珥所講 ê, 講, 17 上帝講, Tī 路尾 ê 時日, 我 beh 用我 ê 神降落 tī 凡有肉體 ê; Lín ê 後生 lín ê cha-bó-kiáⁿ beh 做先知講話, Lín ê 少年人 beh 看見異象, Lín ê 老人 beh 得 tiòh 眠夢; 18 Tī hiah-ê 日我也 beh 用我 ê 神 降落 tī 我 ê 奴僕奴婢; in 亦 beh 做先知來講。19 頂面 tī 天裡我 beh 顯出奇事, 下面 tī 地裡我 beh 顯出神蹟, 就是血, kap 火, kap 煙霧; 20 日 beh 變做暗, 月 beh 變做血, Tī 主大 koh 榮顯 ê 日, bē 到 ê 事先; 21 Koh 凡若求叫主 ê 名 ê, 會得 tiòh 救。

共同經課 - 2 詩篇一百零四篇二十四節~三十四節, 三十五 b 節

24 耶和華 ah, 你所造 ê 怎樣 hiah choē! lóng 是你用智慧造成 ê; 遍地滿滿你 ê 富有。25 Hia 有海, 大 koh 闊, 其中有算 boē 了 ê 動物, 大細 ê 活物 lóng 有。26 Tī-hia 有船 teh 行; 有你所創造 ê 大魚游來游去。27 Chiah-ê lóng teh thèng 候你, Thang 照時 hō in 食物。28 你 hō in, in 就拾起來; 你 thī 開你 ê 手, in 得 tiòh 好物到飽。29 你掩你 ê 面, in 就掛慮; 你將 in ê 氣收回, in 就死無, 來歸 tī 土粉。30 你發出你 ê 神, in 就受創造; 你 hō 地面換做新。31 願耶和華 ê 榮光永遠 tī-teh; 願耶和華為 tiòh 伊所造 ê 來歡喜。32 伊看地, 地就振動; 伊摸山, 山就出煙。33 我 beh 一世人 òng 耶和華吟詩; 我 iáu 活 ê 時 beh òng 我 ê 上帝唱歌 o-ló。34 願伊掠我 ê 靜靜想做合意; 我 beh 因為耶和華歡喜。35 願罪人 tùi 世上消滅, 願 pháiⁿ 人 lóng 無去; 我 ê 心神 ah, tiòh o-ló 耶和華; Lín tiòh o-ló 耶和華。

共同經課 - 3 羅馬書八章十四節~十七節

14 凡若 hō 上帝 ê 神所 chhoā ê, 是做上帝 ê kiáⁿ。15 因為 lín m̄ 是受 tiòh 奴僕 ê 神, 致到 koh 驚惶; 就是受 tiòh 設立做 kiáⁿ ê 神, tùi án-ni 咱叫講, 阿爸, 父 ah。16 聖神家己 kap 咱 ê 神 saⁿ-kap 干證咱做上帝 ê kiáⁿ。17 既然做 kiáⁿ 就做後嗣, 就是做上帝 ê 後嗣, kap 基督同做後嗣; 咱若 kap 伊同受苦, 是 beh hō 咱 kap 伊同榮光。

共同經課 - 4 約翰福音十四章八節~十七節(二十五節~二十七節)

8 腓力 kā 伊講, 主 ah, 用父 hō 阮看, 就夠額。9 耶穌 kā 伊講, 腓力, 我 kap lín tiàm 到 chiah 久, 你 iáu m̄-bat 我 mah? 已經看見我 ê, 就是看見父; 你怎樣講, 用父 hō 阮看 ah? 10 我 tiàm-tī 父, 父亦 tiàm-tī 我, 你 m̄ 信 mah? 我所 kā lín 講 ê 話, m̄ 是出 tī 家己來講; 就是父 toà tī 我來行伊 ê tai-chi。11 我 tiàm-tī 父, 父 tiàm-tī 我, lín tiòh 信我; 若無, 就 tiòh 因為所行 ê 事來信我。12 我實實 kā lín 講, 信我 ê 人, 我所行 ê, 伊 beh 行伊; 就比 chiah-ê 事 khah 大 ê, 亦 beh 行伊; 因為我歸 tī 父。13 Lín tī 我 ê 名, 凡所求 ê, 我 beh 行伊; hō 父 tī Kiáⁿ 得 tiòh 榮光。14 Lín 若 tī 我 ê 名有所求我 ê, 我 beh 行伊。15 Lín 若疼我, 就 beh 守我 ê 命令。16 我亦 beh 對父求, 就伊 beh 用 koh 一個保惠師 hō lín, hō 伊永遠 kap lín toà; 17 就是真理 ê 神; 世間所 boē 接納 ê, 因為無看見伊, koh m̄-bat 伊; 獨獨 lín bat 伊; 因為伊 kap lín saⁿ-kap toà, koh beh tiàm-tī lín。25 我 iáu kap lín toà ê 時, 有將 chiah-ê 話 kā lín 講。26 但是保惠師, 就是聖神, 父 tī 我 ê 名所 beh 差 ê, 伊 beh 將一切 ê 事教示 lín, koh beh hō lín 記得我一切所 kā lín 講 ê。27 我用平安留 tehhou⁷ lín; 我將我 ê 平安賞賜 lín; 我 teh hō lín, m̄ 是親像世間 teh hō 人 ê 款。Lín ê 心莫得擊腹, 亦莫得驚惶。